

potest eis dare ea, quæ tenetur, & ad quæ est obligatus iure diuino. Vt dixi supra in fine primæ veritatis

¶ Quarta veritas. Tenetur etiam Curatus Missam celebrare, diebus quibus Parochiani eius tenentur Missam audire. Quia aliàs iniusta esset obligatio ad audiendam Missam, si non esset aliquis obligatus ad illam celebrandam. Sic dicimus, quod tenetur Parochus populo illa Sacramenta administrare, quæ populus ipse tenetur recipere. Ex Soto in. 4. dist. 13. q. 2. art. 2.

¶ An autem teneatur Parochus illam Missam pro populo offerre sic, quod stipendium, seu mercedem recipere non possit ab alio: bene potest ignorari hoc inculpabiliter à Parocho, quia sunt diuersæ opiniones. Soto enim vbi supra dicit, quod pro suis Parochianis debet, & non pro aliis celebrare. Victoria 3. p. q. 83. in principio tenet contrarium, quia nihil in iure de hoc tractatur. Vnde si in Synodalibus nihil statuitur, potest Parochus etiam in die Dominica Missam aliis applicare.

¶ Quinta veritas. In officio Parochi includitur sepelire mortuos Parochianos suos.